

# KERATAN AKHBAR

TARIKH : 13 NOVEMBER 2022

AKHBAR : KOSMO

MUKA SURAT : 35

## Indonesia-Malaysia-Thailand fokus 3 isu utama pulih ekonomi

### Indonesia-Malaysia-Thailand fokus 3 isu utama pulih ekonomi



JOKOWI (dua dari kiri) menghadiri persidangan IMT-GT di luar Sidang Kemuncak ASEAN di Kemboja. – BIRO AKHBAR SEKRETARIAT PRESIDEN

**JAKARTA** – Presiden Indonesia, Joko Widodo (Jokowi) mengemukakan tiga fokus utama bagi mempercepat pemulihan ekonomi di Indonesia, Malaysia dan Thailand, lapor saluran berita *Liputan6* kelmarin.

Jokowi berucap semasa Sidang Kemuncak Segitiga Pertumbuhan Indonesia-Malaysia-Thailand (IMT-GT) di luar Sidang Kemuncak Persatuan Negara-Negara Asia Tenggara (Asean) di Kemboja, Khamis lalu.

Menurut Jokowi, fokus pertama adalah pemulihan sektor pelancongan sub-serantau yang perlu dilakukan segera selepas merudum secara drastik pada kadar melebihi 90 peratus dalam tempoh dua tahun kebelakangan ini.

"Kaedah baharu perlu dijalan-



kan menerusi pecutan teknologi digital dalam pemasaran, pembangunan pelancongan berdaya tahan dan mampan serta pelancongan inisiatif Tahun Melawat IMT-GT 2023-2025," katanya.

Beliau turut menggalakkan pelancongan halal dibangunkan sebagai sebahagian daripada sasaran untuk menjadi hab halal global dengan nilai pasaran AS\$7 trilion (RM32.9 trilion) menjelang 2030.

Fokus kedua adalah mempercepat pembangunan infrastruktur fizikal dan sumber manusia di mana kedua-duanya tidak boleh dipisahkan dan saling melengkapi.

"Ini selaras dengan keutamaan Jakarta untuk menambah baik infrastruktur dan sumber manusia. Pembangunan infrastruktur fizikal seperti pelabuhan, lapangan terbang, jalan tol termasuk Trans-Sumatera perlu dilakukan.

"Kita mesti fokus untuk menambah baik kesalinghubungan enam koridor ekonomi termasuk pelaksanaan kapal RoRo Dumai-Melaka," jelasnya.

Perkara ketiga adalah mewujudkan ekonomi sub-serantau yang hijau dan mampan dengan ekonomi hijau disasar menjadi masa depan ASEAN. – AGENSI